

sie auch guet wissen tragen, das ir uf dise stundt solch los
gesündt in ewer behausung; hierinen sie euch lang zuge-
sehen und, imerdar bösserung verhofft haben. Dieweil aber
die nit erfolgen, sonder ie lenger, leuchtfertiger und unver-
5 schempter von euch gehandelt werde, künden sie, andern
iren burgern zu einem exempl und ufmerken, lenger nit
umbgeen, sonder haben ordnung und bevelch geben, uf
heutigen tag, und als wir verstanden, werden sie hierinen
nit feuren, euch sampt allen argwönigen personen, so be-
10 grifen werden, unverzogenlich ufzuheben und der stat ge-
brauch nach zu handeln. Das wellen sie eim domcapitel,
dieweil ir, herr doctor, dem loblichen gestift verwandt, gueter
wolmainung vorhin anzaigen, damit wir und meniglichen
wisse, warumb das beschehen seie.« Ab diser rede er-
15 schrack der doctor so hart, das er aller erblaichte; iedoch
leugnet er, es wer niemand uf dizmal im haus, dann er
und der knab. So spricht der domdechant: »Herr doctor,
ich gonne ewer unschuldt euch wol, und aber wess sein die
fueftritt!« zaigt im darauf die tritt, wie die hur userm badt
20 entlossen war. Darab erschrack der doctor noch mer, bat
die herren baidt vom Gottes willen, in solchen grosen netten
in armen und von meniglichem verlassnen nit zu begeben,
sonder bei im zu bleiben, damit, ob die verordneten scher-
gen kommen würden, daz er doch einichen trost bei im het,
25 der die schergen ufhalten oder sonst das böst darzu reden
kündte. Die baidt herren namen sich an, sie künten nit
bleiben, sie müesten wider in das capitel. Do war dem
doctor nit mehr gehewr, er wolt ie nit allain im haus bleiben
und der schergen erwarten, derhalben er eilendts user dem
30 badt, sich one verzug anlegt. Mitler weil war die magt
user der ober kammer und verborgnen schlupf berüeft, die
muest herab. Mit der triben die herren ir gesprech, bis
der doctor wider angelegt. Also het kein diener genawer
uf die baid herren könden warten, als der doctor. Wie oft
35 er umb sich gesehen nach den schergen, das ist wol zu ge-
denken. Mich verwundert allain, wie sie das gelechter so
lang verhalten könden. Sie haben den doctor uf der gasen
kains wegs von inen bringen künden. Iedoch, als sie durch
40 kain ander mittel sich sein entladen oder los machen künden,
sein sie wider in bruederhoff und in das capitelhaus gangen;

24 einichen] hs. nit einichen.